

TSHEGOFATSO YA GO OBAMELA MELAO WA MODIMO BEKE 1

Setlhogo: Fa ke obamela melao ya Modimo, ke a segofadiwa.

Mokgosi: Fa ke obamela melao ya Modimo, ke a segofadiwa!

Beke ya Ntlha : Go raya eng go obamela Modimo?

Temana ya tlhogo: Jakobe 1:22 Lo nne badiri ba lefoko, e seng bautlwi fela... dirang se se go rayang gore o se dire!

Dumelang bana! A lo tsogile? A le itse se re buang ka sone mo bekeng e? Re bua ka tshegofatso ya go obamela melao wa Modimo. Mo mosong ono, le ne la ithuta gore fa re obamela Modimo, o a re segofatsa. Ke gone, re direla Modimo yo o ratang go aba dilo tse di ntle! Mokgosi wa gompiano o a reng? Fa ke obamelo melao ya Modimo... (ke a segofadiwa!) Gompiano re ya go bua ka mosadi mongwe wa mo Baebeleng. E bile, le leina la gagwe ga re le bolelelwe, mme re bolelelwa gore o ne a obamela Modimo, mme Modimo a mo duela ka go dira seo.

Re ya go bua le ka gore go raya eng go obamela melao ya Modimo. Re simolole? Itseng gore kobamelo e maatla, gape e tliša tuelo e tona!

POLELO:

Motlholagadi yo o neng a Obamela molao wa ga Modimo

Bogologolo ko motseng yo o neng o le kgakalanyana, go ne go nna mosadimogolo mongwe. Baebele ga e re bolelele leina la gagwe, mme rona re tla o re e ne e le ene Agnes. Agnes o ne a tshela botshelo jo bo utlwisang botlhoko tota. Monna wa gagwe o ne a tlhokafala ntlha ya pelo ya gagwe e e bokoa. O ne a sena masika, a saletswe ke morwa wa gagwe fela, yo o a neng a mo rata ka pelo ya gagwe yotlhe. Leina la morwa wa gagwe e ne e le ene Michael.

Fa monna wa gagwe a ne a sa ntse a tshela, ba ne ba hudugela kwa lefatsheng lengwe la Isaraele le le neng le bidiwa Syria. Le fa ba ne ba le mmogo, go ne go le thata go tshela o le mo-tswa-kwa. Ba ne ba palelwa ke botshelo jwa se Juta. Ba Juta ba ne ba le tshaba e ipegang godimo. Ba ne ba na le mekgwa e e farologaneng go na le ya bo Agnes, e bile ba ne ba raya Agnes ba re dijo dingwe tse a neng a di ja di ne di sa tshwanelwa go jewa. Le kapari ya bone e ne e farologane. Go ne go le thata tota go tshela ko lefatsheng le le ša, e bile Agnes le Michael ba ne ba rumolwa.

E rile fa monna wa ga Agnes a sena go tlhokafala, pelo ya gagwe e ile ya nna botlhoko tota. Ke ene yo o neng a tliša madi mo lwapeng. Se se ne se raya gore Agnes o ne a tshwanelwa ke go batla tiro gore ba nne le sengwe se ba se jang. A simolola go loga bommanki le dikojwana. Batho ba ne ba sa reke thata ka gore o ne o se moJuta. Go ne go le thata mo go ene le Michael. Tsatsi le ngwe le lengwe fa a apaya dijo tsa maitsebowa, o ne a akanya gore ke dijo tsa bone tsa bofelo. Ba ne ba sa itse gore dijo tsa bone tse di latelang di tlaa tswa kae.

Tsatsi le ngwe le lengwe le le latelang le ne le le bokete go feta le le fetileng mo go Agnes. O ne a sena se a ka se tshelatang.

Mme, bana, Modimo o ne a dirisa Agnes. Reetsang.

E rile tsatsi lengwe Agnes a ntse a tswelletse ka ditiro tsa gagwe tsa metlha yotlhe, a kgobokanya dikgong ko sekgweng, a bona monna mongwe yo o ileng a mo kopo gore a mo siele metsi.

Agnes le Michael ba ne ba se na pompo ko lwapeng la bone, mme o ne a tswa go gelela metsi kwa pompong ya motse mo maphakeleng ao. A rwala dikgong tsa gagwe mo mokwatleng a re o ya go siela moeng yo o metsi kwa lwapeng la bone. E rile fa a sa ntse a re o a tsamaya, monna wa teng a mo kopa le borothonyana.

Tota Agnes o ne a sena borotho jo a neng a ka bo abela moeng yo, kgotlhelele. Ke eng a ne a sa ye go bo kopa ko ba huming ba setshaba, kgotsa mongwe yo o nang le dijo tse dintsi? Dijo tse Agnes a neng a di apaya malatsi otlhe o ne a ipolelela gore ke tsone tsa bofelelo. Go ne go se na ko ba neng ba ka leba teng go bona madi a dijo tse di latelang.

A raya moeng a re, “o tla intshwarela, rra, mme ga ke na le fa e le borotho. Se ke nang na so ke bopi-nyana le mafura-nyana fela. Go lekane go direla nna le morwa ka borotho-nyana. Re ka na ra swa ke tlala fa bo sena go fela. Ga gona sepe gape se re nang na so.”

Monna wa teng a mo leba ka matlho a tletseng lorato le kutlwelo botlhoko. A bo a mo raya a re, “se tshabe, ya lwapang o bo o apaya borotho jwa gago, mme pele ga mo o, o ntirele magwinya-nyana. Modimo a re boupi jwa gago, le mafura a gago ga di na go tlhola di fela.

Agnes a tsamaya a sa itse gore a dire jang jaanong. Monna yo o ne a lebega a siame tota, e bile o ne a mmoleletse gore o utlwile go tswa ko go Modimo. Mme gone, fa a ka mo direla magwinya o ne a a kopileng, o ne a ka seka a salelwa ke sepe...

Bana, lona le akanya gore a dire jang? (Ba neele sebaka sa go araba).

Monna yole o ne a buile sengwe se se tona tota sa gore ga a ka ke a felelwa ke boupi le mafura... le fa a ne a na le pelaelo go se kae, a tsaya tshwetso ya go tshepa monna wa Modimo le Modimo yo a dumelang mo go ene. A tsaya dilo tse a neng a di tlhoka go apaya borotho.

Fa a apaya, a ipotsa gore a o dirile sentle. Fa a leba di dirisiwa tse di neng di setse, a ipotsa gore a mme gone o ka neela monna yo magwinya a. O ne a sa salelwa ke sepe!

Heelang! Pelo ya gagwe ke fa e itaya fa a tsamaisetsa monna wa teng magwinya a bothito. O tsene a tswa ga nne pele fa a nna le maatla a go isetsa monna wa teng magwinya ko a kopaneng le ene teng.

O batlile go boela lwapeng fa a bona moeng yo o a ntse fa tlase ga setlhare. Mala a gagwe a ne a lela ke tlala. O batlile go boa tota.

Monna wa teng a leboga Agnes thata, a mo raya a re, “Modimo o tlaa go direla go go ntsi ka lebaka la kobamelo le tumelo ya gago.”

Agnes a tabogela lwapeng go bona gore a go na le sengwe se se diragetseng. A ntse a ipotsa mo tseleng gore a se diragetse se monna yole a se buileng. Batho ba ntse ba mo lebeletse ba mo makaletse gore go rileng fa mosadi-mogolo yo o kana a taboga jaana. A fitlha lwapeng la gagwe a feletswe ke mowa.

A tsena a tsaya sejana se go nnang le boupi mo go sone a leba mo teng. “A se tletsi, go na le sengwe se se diragetseng?” A ipotsa. Go ne go le thata go bona pharologanyo. Sejana se ne se tletse! Se ne se sa tlala thata mme go ne go lekanetse gore ene le morwa gagwe ba ka itirela borotha bobeding jwa bone. O ne a sena sepe le mo gongwe gape. Se se botlhokwa ke gore ba ne ba na le se ba ka se jang tsatseng leo. Go ne go sa lebagale a na le dijo tse ba tla di jang go fitlhela go ile, mme ba ne ba na le dijo tse ba neng ba ka dija tsatsi leo go sena ope yo o tla tshwenyang.

Letsatsi le le latelang o ile a tsoga mpa itletse. Go ne go le lebaka a tsoga a sena ditlhabi tsa tlala mo teng ga mpa ya gagwe. E rile fa a leba sejana sa boupi, a fitlhela se tletse, le mufura le one a tletse! A re rorise Modimo! Modimo wa Bajuta ke ene wa buammaarurui. Go tswa letsatseng leo, Agnes le Michael ke fa ba tsaya tshwetso ya gore Morena wa Baebele ke ene Modimo wa bone. Bajuta le bone ba ba amogela.

Akere le a bona gore Modimo o kgona go dirisa mongwe-le-mongwe. Le wena o batla go go dirisa. Agnes e ne e le motlholagadi, mo-tswa-kwa, a le mosadi-mogolo. Mme Modimo o ile a mo dirisa ka tsela e makatsang, a mo direla mo go gakgamatsang ka gore o ile a obamela molao wa ga Modimo.

Le wena kobamelo ya gago Modimo o a e batla. Kwa legodimong o na le mantlo a a tletseng dimpho tsa gago tse a batlang go di go neela fa o ka dira se a se go bolelelang sone. Nako tse dingwe ga re tlhaloganye se Modimo a re se bolelelang gore re se dire, kgotsa se thata, kgotsa maduo a teng a sa bonagale ka bonako, mme gone go mo obamela go na le dituelo tsa tsone.

THUTO:

GO RAYA GO RENG GO OBAMELA MELAO YA MODIMO?

Go obamela melao ke go dira jang? *Ke gone.* Ke go dira se o se boleletsweng gore o se dire. Batho bangwe ba re tshwanetseng go obamela melao ya bone ke bo mang? Batsadi ba rona, Modimo, barutabana ba rona, ...

GO REETSA MODIMO

- Modimo o a bua le rona.
- A lo itse seo?
- Modimo ga bue thata, e seng jaaka nna ke bua le lona.
- Mme wa re kuela e bile o re fa le melao e e re ka e salang morago.
- Modimo o dirisa di tsela di fe go re kaela?
- Tsela e a e dirisang thata ke Baebele.
- Sekai ke Melawana e e lesome.
- E re thusa go itse se se siameng le se se sa siamang.
- Ke gone mo o re balang Baebele.
- Gore re ithute gore Modimo a reng ko go rona.

2 Timotheo 3:16,
Pesalema 119:105,
Diane 30:5

GO DIRA SE MODIMO A RENG RE SE DIRE

- Ga re reetse fela se se mo teng ga Baebele.
- Re tshwanetse go DIRA se A reng re se dire.
- Re sala morago dikai tsa banna ba Modimo ba bogologolo.
- Re dira se ba se dirang fa ba re bontsha gore re tshele jang.
- Re rapela jaaka ba ne ba rapela.
- Re rata ba bangwe jaaka le bone ba neng ba ba rata.
- Re dira se ka gore Modimo o itse go re feta.
- Buang le nna, le re Modimo o itse go re feta.
- Baebele ya re re a segofadiwa fa re obamela melao ya ga Modimo.
- Modimo a re re nne eng, e bile a re re dire eng?

E re ba kwale dilo tse di tshwanang le: Modimo a re re tshepege, a re re ratane, re obamele melao ya batsadi ba rona.

RE OBAMELA MELAO YA GAGWE LE FA GO LE THATA

-Se se raya gore re obamela melao ya Gagwe go sa kgathalesege.

-Sekai!

A o tshwanetse go tswelela o rata mogoloo fa a go tshwenya? Go thata ga kere? Fa re se na dijo, a go siame go tsaya ko baagisaneng ba rona? Nyaa! Ga go a siama. Modimo a re re nne le lorato le fa go le thata, e bile a re re seka ra utswa. A re re kope thuso ko go Ene, re nne le tumelo ko go Ene. O ka re thusa go obamela melao ya Gagwe fa re ka mo kopa, le fa go le thata.

- re nna sekai mo bathong sa gore go raya eng go obamela melao ya Modimo.
- Modimo o boikanyego mo ditshepisong tsa gagwe.
- O a re tlamela .
- O re neela maatla a go rata ba ba leng thata le go ratega.
- Modimo o re neela mo go ntsi le go feta.
- O rata go re segofatsa ka mo go fetang mo re go tlhokang fa re obamela melao ya gagwe.

DIPOTSO:

Go raya eng go obamela melao ya Modimo?

Ke mang yo re ithutileng ka ene gompiano yo o neng a obamela melao ya Modimo?

Agnes e ne e le motlholagadi, seo se raya eng?

Modimo o ne a kopa Agnes gore a dire jang?

A go motlhofo go tsaya batho sentle ba re sa ba itseng?

A re ithuteng. Ke batla gore mongwe-le-mongwe wa lona a batle motho yo a sa mo itseng A bo o ikitsise ko go ene. Mo tshware ka siatla, o mmolelele gore o itumeletse go mo itse.

Re ne re re fa re obamela melao ya Modimo, ke eng se se diragalang?

Re a segofadiwa.